

四庫全書

集部

欽定四庫全書

李太白文集卷十六

唐 李白 撰

歌詩三十首

酬答下

答王十二寒夜獨酌有懷

再入
吳中

昨夜吳中雪子猷佳興發萬里浮雲卷碧山青天中道
流孤月孤月滄浪

一作
波

河漢清北斗錯落長庚明懷余

對酒夜霜白玉牀金井冰崢嶸人生飄忽百年內且須
酣暢萬古情君不能捫膏金距學鬪雞坐令鼻息吹虹
霓君不能學哥舒橫行青海夜帶刀西屠石堡取紫袍
吟詩作賦北窓裏萬言不直一杯水世人聞此一作皆

掉頭有如東風射馬耳魚目亦笑我請一作謂與明月同

驂騑拳跼不能食寒驢得志鳴春風折楊黃花合流俗

晉君聽琴枉清角巴一作樂人誰肯和陽春楚地猶來賤

奇璞黃金散盡交不成白首為儒身被輕一談一笑失

顏色蒼蠅貝錦喧謗聲曾參豈是殺人者讒言三及慈
母驚與君論心握君手榮辱於余亦何有孔聖猶聞傷
鳳麟董龍更是何雞狗一生傲岸苦不諧恩疎媒勞志
多乖嚴陵高揖漢天子何必長劒挂頤事玉階達亦不
足貴窮亦不足悲韓信羞將絳灌比穢衡恥逐屠沽兒
君不見李北海英風豪氣今何在君不見裴尚書土墳
三尺蒿棘一作下居少年早欲五湖去見此彌將鍾鼎疎

訓裴侍御對雨感時見贈

金陵

雨色秋來寒風嚴清江爽孤高繡衣人瀟灑青霞賞平生多感激忠義非外獎禍連積怨生事及徂川往楚邦有壯士鄢郢翻掃蕩申包哭秦庭泣血將安仰鞭屍辱已及堂上羅宿莽頗似今之人蝨賊陷忠讜渺然一水隔何由稅歸鞅日夕聽猿愁懷賢盈夢想

訓崔侍御

嚴陵不從萬乘遊歸臥空山釣碧流自是客星辭帝坐元非太白醉揚州

贈李十二攝監察御史崔成甫

附

我是瀟湘放逐臣
君辭明主漢江濱
天外常求太白老
金陵捉得酒仙人

翫月金陵城西孫楚酒樓達曙歌吹日晚乘醉
著紫綺裘烏紗巾與酒客數人棹歌秦淮往石
頭訪崔四侍御

昨翫西城月青天垂玉鉤朝沽金陵酒歌吹孫楚樓忽
憶繡衣人乘船往石頭草裏烏紗巾倒披紫綺裘兩岸

拍手笑疑是王子猷酒客十數公崩騰醉中流謔浪掉
海客喧呼傲陽侯半道逢吳姬卷簾出揶揄我憶君到
此不知狂與羞月下見君三杯便迴橈捨舟共連袂
行上南渡橋興發歌淥水秦客為之搖一作謳雞鳴復相
招清宴逸雲霄贈我數百字字字凌風颺繫之衣裘上
相憶每長謠

江上荅崔宣城

太華三芙蓉明星玉女峯尋仙下西岳陶令忽相逢問

我將何事湍波歷幾重貂裘非季子鶴氅似王恭
謬忝燕臺召而陪郭隗蹤水流知入海雲去或從龍
樹繞蘆洲月山鳴鵲鎮鍾還期如可訪台嶺蔭長松

荅族姪僧中孚贈玉泉仙人掌茶

并序

余聞荊州玉泉寺近清溪諸山山洞往往有乳窟窟
中多玉泉交流中有一一作見白蝙蝠大如鷗按仙經蝙蝠

蝠一名仙鼠千歲之後體白如雪

一作銀

棲則倒懸蓋

飲乳水而長生也其水邊處處有茗草羅生枝葉如

碧玉唯玉泉真公常采而飲之年八十餘歲顏色如
桃花而此茗清香滑熟異於他者所以能還童振枯
壯一作扶人壽也余遊金陵見宗僧中孚示余茶數十

片拳然重疊其狀如手號為仙人掌茶蓋新出乎玉
泉之山曠古未覲因持之見遺兼贈詩要余答之遂
有此作後之高僧大隱知仙人掌茶發乎中孚禪子
及青蓮居士李白也

常聞玉泉山山洞多乳窟仙鼠如白鷗倒懸深

一作清

谿

月茗生此中石玉泉流不歇根柯灑芳津採服潤肌
骨楚老卷綠葉枝枝相接連曝成仙人掌似拍洪崖
肩舉世未見之其名定誰傳宗英乃禪伯投贈有佳
篇清鏡燭無鹽顧慙西子妍朝坐有餘興長吟播諸
天

訓裴侍御留岫師彈琴見寄

君同鮑明遠邀彼休上人鼓琴亂白雪秋變江上春瑤
草綠未衰攀翻寄情親相思兩不見流淚空盈巾

張相公出鎮荊州尋除太子詹事余時流夜郎
行至江夏與張公相去千里公因太府丞王昔
使車寄羅衣二事及五月五日贈余詩余答以

此詩

流夜郎
至江夏

張衡殊不樂應有四愁詩慙君錦繡段贈我慰相思鴻
鵠復矯翼鳳皇憶故池榮樂一如此商山老紫芝

醉後荅丁十八以詩譏予槌碎黃鶴樓

黃鶴高樓已槌碎黃鶴仙人無所依黃鶴上天訴玉帝

却放黃鶴江南歸神明太守再雕飾新圖粉壁還芳菲
一州笑我為狂客少年往往來相譏君平簾下誰家子
云是遼東丁令威作詩掉我驚逸興白雲遶筆窓前飛
待取明朝酒醒罷與君爛漫尋春暉

荅裴侍御先行至石頭驛以書見招期月滿汎

洞庭

君至石頭驛寄書黃鶴樓開緘識遠意速此南行舟風

水無定準湍波或

一作成

滯留憶昨新

一作初

月生西簷若

瓊鉤今來何所似破鏡懸清秋恨不三五明平湖汎澄
流此歡竟莫遂狂殺王子猷巴陵定近遠持贈解人憂
荅高山人兼呈權顧二侯

虹霓掩天光哲后起康濟應運生夔龍開元掃氛翳太
微廓金鏡端拱清遐裔輕塵集嵩岳虛點盛明意謬揮
紫泥詔獻納青雲際讒惑英主心思疎佞臣計徬徨庭
闕下歎息光陰逝未作仲宣詩先流賈生涕挂帆秋江
上不為雲羅制山海向東傾百川無盡勢我於鷗夷子

相去千餘歲運濶英達稀同風遙執袂登艫望遠水忽
見滄浪世高士何處來虛舟渺安繫衣貌本淳古文章
多佳麗延引故鄉人風義未淪替顧侯達語默權子識
通蔽曾是無心雲俱為此留滯雙萍易飄轉獨鶴思凌
厲明晨去瀟湘共謁蒼梧帝

荅杜秀才五松山見贈

五松山南陵銅坑
西五六里宣城

昔獻長楊賦天開雲雨歡當時待詔承明裏皆道揚雄
才可觀勅賜飛龍二天馬黃金絡頭白玉鞍浮雲蔽日

去不返總為秋風摧紫蘭角巾東出商山道採秀行歌
詠芝草路逢園綺笑向人而君解來一何好聞道金陵
龍虎盤還同謝朓望長安千峯夾水向秋浦五松名山
當夏寒銅井炎鑪歇九天赫如鑄鼎荆山前陶公矍鑠
呵赤電回祿睂盱揚紫煙此中豈是久留處便欲燒丹
從列仙愛聽松風且高臥颼颼吹盡炎氛過登崖獨立
望九州陽春欲奏誰相和聞君往年遊錦城章仇尚書
倒屣迎飛牋絡驛奏明主天書降問迴恩榮骭髀不能

就珪組至今空揚高道名夫子工文絕世奇五松新作
天下推吾非謝尚邀彥伯異代風流各一時一時相逢
樂在今袖拂白雲開素琴彈為三峽流泉音從茲一別
武陵去去後桃花春水深

至陵陽山登天柱石酬韓侍御見招隱黃山

韓衆騎白鹿西往華山中玉女千餘人相隨在雲空見
我傳祕訣精誠與天通何意到陵陽遊目送飛鴻天子
昔避狄與君亦乘驄擁兵五陵下長策遏胡戎時泰解

繡衣脫身若飛蓬鸞鳳翻羽翼啄粟坐樊籠海鶴一笑
之思歸向遼東黃山過石柱巘寧上攢叢因巢翠玉樹
忽見浮丘公又引王子喬吹笙舞松風朗詠紫霞篇請
開藥珠宮步網繞碧落倚樹招青童何日可攜手遺形
入無窮

訓崔十五見招

爾有鳥跡書相招琴溪飲手跡尺素中如天落雲錦讀
罷向空笑疑君在我前長吟字不減懷袖且三年

遊宴上

遊南陽白水登石激作

襄陽

朝涉白水源暫與人俗疎
島嶼佳境色江天涵清虛
目送去海雲心閒遊川魚
長歌盡落日乘月歸田廬

遊南陽清冷泉

惜彼落日暮愛此寒泉清
西耀逐水流蕩漾遊子情
空歌望雲月曲盡長松聲

尋魯城北范居士失道落蒼耳中見范置酒摘

蒼耳作

魯中

鴈度秋色遠日靜無雲時客心不自得浩漫將何之忽
憶范野人閒園養幽姿茫然起逸興但恐行來遲城壕
失往路馬首迷荒陂不惜翠雲裘遂為蒼耳欺入門且
一笑把臂君為誰酒客愛秋蔬山盤薦霜梨他筵不下
筯此席忘朝饑酸棗垂北郭寒瓜蔓東籬還傾四五酌
自詠猛虎詞近作十日歡遠為千載期風流自簸蕩謔
浪偏相宜酣來上馬去却笑高陽池

魯東門汎舟二首

日落沙明天倒開，波搖石動水縈迴。
輕舟汎月尋溪轉，疑是山陰雪後來。

水作青龍盤石堤，桃花夾岸魯門西。
若教月下乘舟去，何啻風流到剡溪。

秋獵孟諸夜歸置酒單父東樓觀妓

傾暉速短炬，走海無停川。
冀飡圓丘草，欲以還顏年。
此事不可得，微生若浮烟。
俊發跨名駒，雕弓控鳴弦。
鷹豪

魯草白狐兔多肥鮮
邀遮相馳逐遂出城東田一掃四
野空喧呼鞍馬前歸來獻所獲
炮炙宜霜天出舞兩美人飄飄若
雲仙留歡不知疲清曉方來旋

遊太山六首

一作天寶元年四月
從故御道上太山

四月上太山石平御道開
六龍過萬壑澗谷隨紫迴馬
跡遶碧峯于今滿青苔飛流灑
絕巘水急一作松聲

哀北眺萼嶂奇傾崖向東
摧洞門閉石扇地底興雲雷
登高望蓬瀛想像金銀臺
天門一長嘯萬里清風來玉

女四五人飄飄下九垓含笑引素手遺我流霞盃稽首
再拜之自媿非仙才曠然小宇宙棄世何悠哉

清曉騎白鹿直上天門山山際逢羽人方瞳好容顏捫
蘿欲就語却掩青雲關遺我鳥跡書飄然落巖間其字
乃上古讀之了不閒感此三歎息從師方未還

平明登日觀舉手開雲關精神四飛揚如出天地間黃
河從西來窈窕入遠山憑崖覽八極目盡長空閒偶然
值青童綠髮雙雲鬟笑我晚學仙蹉跎凋朱顏躊躇忽

欽定四庫全書

李太白集
卷十六

不見浩蕩難追攀

清齋三千日裂素寫道經吟誦有所得衆神衛我形雲
行信長風颯若羽翼生攀崖上日觀伏檻窺東溟海色
動遠山天雞已先鳴銀臺出倒景白浪翻長鯨安得不
死藥高飛向蓬瀛

日觀東北傾兩崖夾雙石海水落眼前天光遙空碧千
峯爭攢聚萬壑絕凌歷緬彼鶴上仙去無雲中跡長松
入霄漢遠望不盈尺山花異人間五月雪中白終當遇

安期於此鍊玉液

朝飲王母池暝投天門闕獨抱綠綺琴夜行青山月
明月露白夜靜松風歇仙人遊碧峯處處笙歌發寂聽
娛清輝玉真連翠微想像鸞鳳舞飄飄龍虎衣捫天摘
匏瓜恍惚不憶歸舉手弄清淺誤攀織女機明晨坐相
失但見五雲飛

秋夜與劉碭山汎宴喜亭池

明宰試舟楫張燈宴華池文招梁苑客歌動郢中兒月


色望不盡空天交相宜令人欲汎海只待長風吹

攜妓登梁王棲霞山孟氏桃園中

碧草已滿地與柳梅爭春謝公自有東山妓金屏笑坐
如花人今日非昨日明日還復來白髮對綠酒強歌心
已摧君不見梁王池上月昔照梁王樽酒中梁王已去
明月在黃鸝愁醉啼春風分明感激眼前事莫惜醉臥
桃園東

觀魚潭

觀魚碧潭上木落潭水清日暮紫鱗躍圓波處處生涼
烟浮竹盡秋月照沙明何必滄浪去茲馬可濯纓



李太白文集卷十六

欽定四庫全書

集部

李太白文集卷十七至十九

詳校官侍郎

臣謝墉

檢討

臣何思鈞覆勘

總校官庶吉士

臣

何思鈞

校對官中書

臣李

荃

謄錄監生

臣馮士新

欽定四庫全書

李太白文集卷十七

唐 李白 撰

歌詩四十六首

遊宴下

與從姪杭州刺史良遊天竺寺

吳中

挂席凌蓬丘，觀濤憩樟樓。
三山動逸興，五馬同遨遊。
天竺森在眼，松門颯驚秋。
覽雲測變化，弄水窮清幽。
疊嶂

隔遙海當軒寫歸流詩成傲雲月佳趣滿吳洲

同友人舟行遊台越作

楚臣傷江楓謝客拾海月懷沙去瀟湘挂席汎溟渤蹇
予訪前跡獨往造窮髮古人不可攀去若浮雲沒願言
弄倒景從此鍊真骨華頂窺絕冥蓬壺望超忽不知青
春度但怪綠芳歇空持釣鰲心從此謝魏闕

下終南山過斛斯山人宿置酒

長安

暮從碧山下山月隨人歸却顧所來徑蒼蒼橫翠微相

攜及田家童稚

一作稚子

開荆扉綠竹入幽援青蘿拂行衣

歡言得所憩美酒聊共揮長歌吟松風曲盡河星稀我
醉君復樂陶然共忘機

朝下過盧郎中叙舊遊

君登金華省我入銀臺門幸遇聖明主俱承雲雨恩復
此休浣時閑為疇昔言却話山海事宛然林壑存明湖
思曉月疊嶂憶清猿何由返初服田野醉芳樽

侍從遊宿溫泉宮作

羽林十二將羅列應星文霜仗懸秋月蜺旌卷夜雲嚴
更千戶肅清樂九天聞日出瞻佳氣叢叢繞聖君

邯鄲南亭觀妓

燕趙

歌鼓

一作妓

燕趙兒魏姝弄鳴絲粉色艷月彩舞袖

一作衫

拂花枝把酒領

一作顧

美人請歌邯鄲詞清箏何繚繞度

曲綠雲垂平原君安在科斗生古池座客三千人于今
知有誰我輩不作樂但為後代悲

春遊羅敷潭

行歌入谷口路盡無人躋攀崖度絕壑弄水尋迴磎雲
從石上起客到花間迷淹留未盡興日落羣峰西

春陪商州裴使君遊石娥溪

時欲東歸
遂有此贈

裴公有仙標拔俗數千丈澹蕩滄洲雲飄飄紫霞想剖
竹商洛間政成心已閑蕭條出世表冥寂閉玄關我來
屬芳節解榻時相悅褰帷對雲峰揚袂指松雪暫出東
城邊遂遊西巖前橫天聳翠壁噴壑鳴紅泉尋幽殊未
歇愛此春光發溪傍饒名花石上有好月命駕歸去來

露華生綠苔淹留昔將晚復聽清猿哀清猿斷人腸遊
子思故鄉明發首東路此歡焉可忘

陪從祖濟南太守汎鵲山湖三首

齊州

初謂鵲山近寧知湖水遙此行殊訪戴自可緩歸橈
湖濶數十里湖光搖碧山湖西正有月獨送李膺還
水入北湖去舟從南浦迴遙看鵲山轉却似送人來

春日陪楊江寧及諸官宴北湖感古作

金陵

昔聞顏光祿攀龍宴京

一作重
又作明

湖樓船入天鏡帳殿開

雲衢君王歌大風如樂豐沛都延年獻嘉作邈與詩人

俱我來不及此獨立鍾山孤楊宰穆清賦一作芳聲騰

海隅英寮滿四座粲若瓊林敷鷄首弄倒景蛾眉掇明

珠新絃採一作來梨園古舞嬌吳歆曲度繞雲一作清漢聽

者皆歡娛雞棲何嘈嘈一作江月沸笙竽古之帝宮苑

今乃人樵蘇感此勸一觴願君覆瓢壺榮盛一作盛時當作

樂無令後賢吁

宴鄭叅卿山池

爾恐碧草晚我畏朱顏移愁看楊花飛置酒正相宜歌聲送落日舞影迴清池今夕不盡盃留歡更邀誰

遊謝氏山亭

淪老卧江海再歡天地清病閑久寂寞歲物徒芬榮借君西池遊聊以散我情掃雪松下去捫蘿石道行謝公池塘上春草一作風颯已生花枝拂人來山鳥向我鳴田

家有美酒落日與之傾醉罷弄歸月遙欣稚子迎

把酒問月

故人賈淳
令余問之

青天有月來幾時我今停盃一問之人攀明月不可得
月行却與人相隨皎如飛鏡臨丹闕綠烟滅盡清輝發
但見宵從海上來寧知曉向雲間沒白兔搗藥秋復春
姮娥孤棲與誰鄰今人不見古時月今月曾經照古人
古人今人若流水共看明月皆如此唯願當歌對酒時
月光長照金罍裏

同族姪

一作弟

評事黯遊昌禪師山池二首

遠公愛康樂為我開禪關蕭然松石下何異清涼山花

將色不染水與心俱閑一坐度小劫觀空天地間

客來花雨際秋水落金池片石寒青錦疎楊挂綠絲高
僧拂玉柄童子獻霜梨惜去愛佳景烟蘿欲暝時

金陵鳳凰臺置酒

置酒延落景金陵鳳凰臺長波寫萬古心與雲俱開借
問往昔時鳳凰為誰來鳳凰去已久正當今日迴明君
越羲軒天老坐三台豪士無所用彈絃醉金罍東風吹
山花安可不盡杯六帝沒幽草深宮冥綠苔置酒勿復

道歌鍾但相催

秋浦清溪雪夜對酒客有唱鷓鴣者

秋浦

披君

一作我

貂襜褕對君白玉壺雪花酒上滅頓覺夜寒

無客有桂陽至能吟山鷓鴣清風動牕竹越鳥起相呼
持此足為樂何煩笙與竽

與周剛青溪玉鏡潭宴別

潭在秋浦桃樹陂
下予新名此潭

康樂上官去永嘉遊石門江亭有孤嶼千載跡猶存我
來憩秋浦三入桃陂源千峰照

一作點

積雪萬壑盡啼猿

興與謝公合文因周子論掃崖去落葉席月開清樽溪
當大樓南溪水正南奔迴作玉鏡潭澄明洗心魂此中
得佳境可以絕囂喧清夜方歸來一作歌出平原別
後經此地為予謝蘭蓀

遊秋浦白苧陂二首

何處夜行好月明白苧陂山光搖積雪猿影挂寒枝但
恐佳景晚小令歸棹移人來有清興及此有相思

白苧夜長嘯爽然溪谷寒魚龍動陂水處處生波瀾天

借一明月飛來碧雲端
故鄉不可見腸斷正西看

宴陶家亭子

尋陽

曲巷幽人宅高門大士家
池開照膽鏡林吐破顏花
綠水藏春日青軒祕晚霞
若聞絃管妙金谷不能誇

在水軍宴韋司馬樓船觀妓

永王軍中

搖曳帆在空清流

一作川

順歸風詩因鼓吹發酒為劒歌

雄對舞青樓妓雙鬟白玉童
行雲且莫去留醉楚王宮
流夜郎至江夏陪長史叔及薛明府宴興德寺

南閣江夏

紺殿橫江上青山落鏡中岸迴沙不盡日映水成空天

樂流

一作聞

香閣蓮舟颺晚風恭陪竹林宴留醉與陶公

汎沔州城南郎官湖并序

乾元歲秋八月白遷於夜郎遇故人尚書郎張謂出
使夏口沔州牧杜公漢陽宰王公觴于江城之南湖
樂天下之再平也方夜水月如練清光可掇張公殊
有勝槩四望超然乃顧白曰此湖古來賢豪遊者非

一而枉踐佳景寂寥無聞夫子可為我標之嘉名以
傳不朽白因舉酒酌水號之曰郎官湖亦猶鄭圃之
有僕射陂也席上文士輔翼岑靜以為知言乃命賦
詩紀事刻石湖側將與大別山共相磨滅焉

張公多逸興共汎沔城隅當時秋月好不減武昌都四
坐醉清光為歡古來無郎官愛此水因號郎官湖風流
若未減名與此山俱

陪侍郎叔遊洞庭醉後三首

今日竹林宴我家賢侍郎三盃容小阮醉後發清狂
船上齊橈樂湖心汎月歸白鷗閑不去爭拂酒筵飛
剡却君山好平鋪湘水流巴陵無限酒醉殺洞庭秋

夜汎洞庭尋裴侍御清酌

日晚湘水淥孤舟無端倪明湖漲秋月獨汎巴陵西遇
憩裴逸人巖居陵丹梯抱琴出深竹為我彈鷓鴣曲盡
酒亦傾北牕醉如泥人生且行樂何必組與珪

陪族叔刑部侍郎曄及中書賈舍人至遊洞庭

五首

洞庭西望楚江分水盡南天不見雲
日落長沙秋色遠
不知何處弔湘君

南湖秋水夜無烟耐可乘流直上天
且就洞庭賒月色
將船買酒白雲邊

洛陽才子謫湘川元禮同舟月下仙
記得長安還欲笑
不知何處是西天

洞庭湖西秋月輝瀟湘江北早鴻飛
醉客滿船歌白紵

不知霜露入秋衣

帝子瀟湘去不還
空餘秋草洞庭間
淡掃明湖開玉鏡
丹青畫出是君山

楚江黃龍磯南宴楊執戟治樓

荆楚

五月分五洲碧山對青樓
故人楊執戟春賞楚江流
一見醉漂月三杯歌棹謳
桂枝攀不盡他日更相求

銅官山醉後絕句

宣城

我愛銅官樂千年未擬還
要須迴舞袖拂盡五松山

與南陵常贊府遊五松山

山在南陵銅井西
五里有古精舍

安石汎溟渤獨嘯長風還逸韻動海上高情出人間靈
異可並跡澹然與世閑我來五松下置酒窮躋攀徵古
絕遺老因名五松山五松何清幽勝境美沃洲蕭颯鳴
洞壑終年風雨秋響入百泉去聽如三峽流剪竹掃天
花且從傲吏遊龍堂若可憩吾欲歸精脩

宣城清溪

一作入
青溪山

青溪勝桐廬水木有佳色山貌日高古石容天傾側綵

鳥昔未名白猿初相識不見同懷人對之空歎息

與謝良輔遊涇川陵巖寺

乘君素舸汎涇西宛似雲門對若溪且從康樂尋山水
何必東遊入會稽

遊水西簡鄭明府

天宮水西寺雲錦照東郭清湍鳴迴溪綠竹遶飛閣涼
風日瀟灑幽客時憩泊五月思貂裘謂言秋霜落石蘿
引古蔓岸筍開新箨吟翫空復情相思爾佳作鄭公詩

人秀逸韻宏寥廓何當一來遊
愜我雪山諾

九日登山

淵明歸去來不與世相逐為無杯中物
遂偶本州牧因招白衣人笑酌黃花菊
我來不得意虛過重陽時題輿何俊發
遂結城南期築土接響山俯臨宛水湄
胡人叫玉笛越女彈霜絲自作英王冑
斯樂不可窺赤鯉湧琴高白龜道馮夷
靈仙如彷彿奠醑遙相知古來登高人
今復幾人在滄洲違宿諾明日猶可待
連山似驚波合

脊出溟海揚袂揮四座
醑酊安所知齊歌送清觴起舞
亂參差賓隨葉落散帽逐秋風
吹別後登此臺願言長相思

九日

今日雲景好水綠秋山明
攜壺酌流霞寒菊汎寒榮
地遠松石古風揚絃管清
窺觴照歡顏獨笑還自傾
落帽醉山月空歌懷友生

九日龍山飲

當塗

九日龍山飲黃花笑逐臣醉看風落帽舞愛月留人

九月十日即事

昨日登高罷今朝更舉觴菊花何太苦遭此兩重陽

陪族叔當塗宰遊化城寺升公清風亭

化城若化出金榜天宮開疑是海上雲飛空結樓臺升

公湖上

一作中

秀粲然有辯才濟人不利已立俗無嫌猜

了見水中月青蓮出塵埃閑居清風亭左右清風來當
暑陰廣殿太陽為徘徊茗酌待幽客珍盤薦彫梅飛文

何灑落萬象為之摧季父擁鳴琴德聲布雲雷雖避道
林室亦一作不舉陶潛盃清樂動諸天長松自吟哀留歡
若可盡劫石乃成灰

李太白文集卷十七

欽定四庫全書

李太白文集卷十八

唐 李白 撰

歌詩三十六首

登覽

登錦城散花樓

蜀中

日照錦城頭朝光散花樓
金牕夾繡戶珠箔懸瓊鉤
飛梯綠雲中極目散我憂

一作愁

暮雨向三峽春江繞雙流

今來一登望如上九天遊

登峨眉山

蜀國多仙山峨眉邈難匹
周流試登覽絕怪安可悉
青冥倚天開彩錯疑畫出
冷然紫霞賞果得錦囊術
雲間吟瓊簫石上弄寶瑟
平生有微尚歡笑自此畢
烟容如在顏塵累忽相失
儻逢騎羊子攜手凌白日

大庭庫

魯中

朝登大庭庫雲物何蒼然
莫辨陳鄭火空靈鄒魯烟
我

來尋梓慎觀化入寥天古木翔氣多松風如五絃帝圖
終冥沒歎息滿山川

登單父陶少府半月臺

陶公有逸興不與常人俱葉臺像半月迥向

一作出

高城

隅置酒望白雲商

一作高

颺起寒梧秋山入遠海桑柘羅

平蕪水色淥且明

一作清

令人思鏡湖終當過江去愛此

暫踟躕

天台曉望

吳中

天台鄰四明華頂高百越門標赤城霞樓棲滄島月憑
高遠登覽直下見溟渤雲垂大鵬翻波動巨鼇沒風潮
爭洶湧神怪何翕忽觀竒跡無倪好道心不歇攀條摘
朱實服藥鍊金骨安得生羽毛千春卧蓬闕

早望海霞邊

四明三千里朝起赤城霞日出紅光散分輝照雪崖一
餐嚙瓊液五內發金沙舉手何所待青龍白虎車

焦山杳望松寥山

石壁望松寥宛然在碧霄
安得五綵虹架天作長橋
仙人如愛我舉手來相招

杜陵絕句

長安

南登杜陵上北望五陵間
秋水明落日流光滅遠山

登太白峰

西上太白峰夕陽窮登攀
太白與我語為我開天關
願乘冷風去直出浮雲間
舉手可近月前行若無山
一別武功去何時復更還

登邯鄲洪波臺置酒觀發兵

燕趙時將
遊薊門

我把兩赤羽來遊燕趙間
天狼正可射感激無時閑
觀兵洪波臺倚劒望玉關
請纓不繫越且向燕然山
風引龍虎旗歌鐘昔一作憶
追攀擊筑落高月投壺破
愁顏遙知百戰勝定掃鬼
方還

登廣武古戰場懷古

秦鹿奔野草逐之若飛蓬
項王氣蓋世紫電明雙瞳
呼吸八千人橫行起江東
赤精斬白帝叱咤入關中
兩龍

不並躍五緯與天同楚滅無英圖漢興有來功按劒清
八極歸酣歌大風伊昔臨廣武連兵決雌雄分我一杯
羹太皇乃汝翁戰爭有古跡壁壘頽層穹猛虎吟洞壑
飢鷹鳴秋空翔雲列曉陣殺氣赫長虹撥亂屬豪聖俗
儒安可通沈湎呼豎子狂言非至公撫掌黃河曲嗤嗤
阮嗣宗

登新平樓

陝西

去國登茲樓懷歸傷暮秋天長落日遠水淨寒波流秦

雲起嶺樹胡雁飛沙洲蒼蒼幾萬里目極令人愁

謁老君廟

梁宋

先君懷聖德靈廟肅神心草舍人蹤斷塵濃鳥跡深
流沙丹竈滅關路紫烟沈獨傷千載後空餘松柏林

秋日登揚州西靈塔

淮南

寶塔凌蒼蒼登攀覽四荒頂高元氣合標出海雲長萬
象分空界三天接畫梁水搖金刹影日動火珠光鳥拂
瓊簷度霞連繡拱張目隨征路斷心逐去帆揚露浩梧

楸白風催橘柚黃玉毫如可見於此照迷方

登金陵冶城西北謝安墩

此墩即晉太傅謝安與右軍王羲之同登

超然有高世之志余將營園其上故作是詩 金陵

晉室昔橫潰永嘉遂南奔沙塵何茫茫龍虎鬪朝昏胡
馬風漢草天驕蹙中原拓匠感積運雲鵬忽飛翻組練
照楚國旌旗連海門西秦百萬衆戈甲如雲屯投鞭可
填江一掃不足論

一作投策可填江一朝為我吞

皇運有返正醜虜無

遺魂談笑遏橫流蒼生望斯存冶城訪古跡

一作至今冶城隅

猶有謝安墩憑覽周地險高標絕人喧想像東山姿緬
懷右軍言梧桐識佳樹蕙草留芳根白鷺映春洲青龍
見朝暾地古雲物在臺傾禾黍繁我來酌清波於此樹
名園功成拂衣去歸入一作長嘯武陵源

登瓦官閣

晨登瓦官閣極眺金陵城鍾山對北戶淮水入南榮漫
漫雨花落嘈嘈天樂鳴兩廊振法鼓四角吟一作吹風箏
杳出霄漢上仰攀日月行山空霸氣滅地古寒陰生寥

廓雲海晚蒼茫宮觀平門餘閭闔字樓識鳳皇名雷作
百山動神扶萬拱傾靈光何足貴長此鎮吳京

登梅崗望金陵贈族姪高座寺僧中孚

鍾山抱金陵霸氣昔騰發天

一作神

開帝王居海色照宮

闕羣峰如逐鹿奔走相馳突江水九道來雲端遙明沒
時遷大運去龍虎勢休歇我來屬天清登覽窮楚越吾

宗挺禪伯特秀鸞鳳骨

一作吾宗道門秀特異鸞鳳骨

衆星羅青天朗

者獨有月冥居順生理草木不翦伐烟牕引薔薇石壁

老野蔽吳風謝安屐白足傲履襪幾宿一下山

一作下山來

蕭然忘干謁談經演金偈降鶴舞海雪時聞天香來了
與世事絕佳遊不可得春去惜遠別賦詩留巖屏千載
庶不滅

登金陵鳳皇臺

鳳皇臺上鳳皇遊鳳去臺空江自流吳宮

一作時

花草埋

幽徑晉代

一作國

衣冠成古丘三山半落青天外一水

一作

二水中分白鷺洲總為

一作盡道

浮雲能蔽日長安不見使人

愁

望廬山瀑布二首

尋陽

西登香爐峰南見

一作望

瀑布水挂流三百丈

一作三千匹

噴

壑數十里歛如飛電

一作練

來隱若白虹起初驚河漢

一作

銀落半灑雲天裡

一作金潭裡

仰觀勢轉雄壯哉造化功

海風吹不斷江

一作山

月照還空中亂溲射左右洗青

壁飛珠散輕霞流沫沸穹石而我遊名山對之心益閑

無論漱瓊液且得洗塵顏且諧宿所好永願辭人間

一作

集譜宿所好
永不歸人間

日照香爐生紫烟遙看瀑布挂長川飛流直下三千尺

疑是銀河落九

一作半

天

一本題云望廬山香爐峰瀑布曰廬山上與星斗連日照香爐

生紫烟下
兩句同

望廬山五老峰

廬山東南五老峰青天削出金芙蓉九江秀色可攬結
吾將此地巢雲松

江上望皖公山

宿松

奇峰出奇雲秀木含秀氣青宴皖公山巉絕稱人意獨
遊滄江上終日淡無味但愛茲嶺高何由討靈異默然
遙相許欲往心莫遂待吾還丹成投跡歸此地

望黃鶴山

江夏岳陽

東望黃鶴山雄雄半空出四面生白雲中峰倚紅日巖
巒行穹跨峰嶂亦冥密頗聞列仙人於此學飛術一朝
向蓬海千載空石室金竈生烟埃玉潭祕清謚地古遺
草木庭寒老芝朮蹇余羨攀躋因欲保閑逸觀奇徧諸

嶽茲嶺不可匹結心寄青松永悟客情畢

鸚鵡洲

鸚鵡來過吳江水江上洲傳鸚鵡名鸚鵡西飛隴山去
芳洲之樹何青青烟開蘭葉香風暖岸夾桃花錦浪生
遷客此時徒極目長洲孤月向誰明

九日登巴陵置酒望洞庭水軍

時賊逼華容縣

九日天氣清登高無秋雲造化闢川岳了然楚漢分長
風鼓橫波合省覺龍文憶昔傳遊豫樓船壯橫汾今茲

討鯨鯢旌旆何繽紛白羽落酒樽
洞庭羅三軍黃花不
撥手戰鼓遙相聞
劒舞轉積陽當時日
停曛酣歌激壯
士可以摧妖氛
蹉跎東籬下淵明不足羣

秋登巴陵望洞庭

清晨登巴陵周覽無不極
明湖映天光徹底見秋色
秋色何蒼然際海俱澄鮮
山青滅遠樹水淥無寒烟
來帆出江中去鳥向日邊
風清長沙浦霜空雲夢田
瞻光惜
積髮閱水悲徂年
北渚既蕩漾東流自潺湲
郢人唱白

雪越女歌採蓮聽此更腸斷憑崖淚如泉

與夏十二登岳陽樓

樓觀岳陽盡川迥洞庭開雁引愁心去

一作雁別秋江去

山衛

好月來雲間逢下榻天上接行盃醉後涼風起吹人舞袖迴

登巴陵開元寺西閣贈衡岳僧方外

衡岳有開士五峰秀真骨見君萬里心海水照秋月大臣南溟去問道皆請謁灑以甘露言清涼潤肌髮明湖

落天鏡香閣凌銀闕登眺餐惠風新花期啓發

與賈舍人於龍興寺剪落梧桐枝望灊湖

剪落青梧枝灊湖坐可窺雨洗秋山淨林光澹碧滋水
開明鏡轉雲繞畫屏移千古風流事名賢共此時

挂席江上待月有懷

待月月未出望江江自流倏忽城西郭青天懸玉鉤素
華難可攬清景不同遊耿耿金波裡空瞻鵲樓

金陵望漢江

漢江迴萬里派作九龍盤橫瀆豁中國崔嵬飛迅湍六
帝淪亡後三吳不足觀我君混區宇垂拱衆流安今日
任公子滄浪罷釣竿

秋登宣城謝朓北樓

宣城

江城如畫裡山曉望晴空兩水夾明鏡雙橋落彩虹人
烟寒一作空橘柚秋色老梧桐誰念北樓上臨風懷謝公

望天門山

當塗

天門中斷楚江開碧水東流直北迴兩岸青山相對出

孤帆一片日邊來

望木瓜山

早起見日出暮看棲鳥還客心自酸楚况對木瓜山

登敬亭北二小山余時客逢崔侍御並登此地

送客謝亭北逢君縱酒還屈盤戲白馬大笑上青山迴鞭指長安西日落秦關帝鄉三千里杳在碧雲間

過崔八丈水亭

高閣橫秀氣清幽併在君簷飛宛溪水牕落敬亭雲猿

嘯風中斷漁歌月裡聞閑隨白鷗去沙上自為羣

李太白文集卷十八

欽定四庫全書

李太白文集卷十九

唐李白撰

歌詩六十一首

行役

安州應城玉女湯作

安州

神女歿幽境湯池流大川陰陽結炎炭造化開靈泉地
底爍朱火沙傍歆素烟沸珠躍晴月皎鏡涵空天氣浮

蘭芳滿色漲桃花然精覽萬殊入潛行七澤連愈疾功
莫尚變盈道乃全濯纓掬清泚晞髮弄潺湲散下楚王
國分澆宋玉田可以奉巡幸奈何隔窮偏獨隨朝宗水
赴海輸微涓

之廣陵宿常二南郭幽居

淮南

淶水接柴門有如桃花源忘憂或假草滿院羅叢萱暝
色湖上來微雨飛南軒故人宿茅宇夕鳥歸楊園還惜
詩酒別深為江海言明朝廣陵道獨憶此傾樽

夜下征虜亭

船下廣陵去月明征虜亭山花如繡頰江火似流螢

下途歸石門舊居

吳中

吳山高越水清握手無言傷別情將欲辭君挂帆去離
魂不散烟郊樹此心鬱悵誰能論有愧叨承國士恩雲
物共傾三月酒歲時同餞五侯門羨君素書常滿案含
丹照白霞色爛余嘗學道窮冥筌夢中往往遊仙山何
當脫屣謝時去壺中別有日月天俛仰人間易凋朽鑪

峯五雲在軒牖惜別愁窺玉女牕歸來笑把洪崖手隱
居寺隱居山陶公鍊液棲其間靈神閉氣昔登攀恬然
但覺心緒閑數人不知幾甲子昨來猶帶冰霜顏我離
雖則歲物改如今了然識所在別君莫道不盡懽懸知
樂客遙相待石門流水徧桃花我亦曾到秦人家不知
何處得雞豕就中仍見繁桑麻脩然遠與世事間裝鸞
駕鶴又服遠何必長從七貴遊勞生徒聚萬金產揖君
去長相思雲遊雨散從此辭欲知悵別心易苦向暮春

風楊柳絲

客中作

蘭陵美酒鬱金香
玉腕盛來琥珀光
但使主人能醉客
不知何處是他鄉

太原早秋

并州

歲落衆芳歇
時當大火流
霜威出塞早
雲色渡河秋
夢遶邊城
月心飛故國
樓思歸若汾水
無日不悠悠

奔亡道中五首

江東

蘇武天上田橫海島邊萬重關塞斷何日是歸年
亭伯去安在李陵降未歸愁容變海色短服改胡衣
談笑三軍却交遊七貴疎仍留一隻箭未射魯連書
函谷如玉關幾時可生還洛川為易水嵩岳是燕山俗
變羌胡語人多沙塞顏申包唯慟哭七日鬢毛斑

淼淼望湖水青青蘆葉齊歸心落何處日沒大江西歇
馬傍春草欲行遠道迷誰忍子規鳥連聲向我啼

郢門秋懷

荊州江夏岳陽

郢門一為客巴月三成弦朔風正搖落行子愁歸旋杳
杳山外日茫茫江上天人迷洞庭水雁度瀟湘烟清曠
諧宿好緇磷及此年百齡何蕩漾萬化相推遷空謁蒼
梧帝徒尋溟海仙已聞蓬岳淺豈見三桃園倚劒增浩
歎捫襟還自憐終當遊五湖濯足滄浪泉

至鴨欄驛上白馬磯贈裴侍御

側疊萬古石橫為白馬磯亂流若電轉舉棹揚珠輝臨
驛卷綈幕升堂接繡衣情親不避馬為我解霜威

荆門浮舟望蜀江

春水月峽來浮舟望安極正見桃花流依然錦江色
江色淥且明茫茫與天平逶迤巴山盡遙曳楚雲行
雪照聚沙雁花飛出谷鶯芳洲却已轉碧樹森森迎
流目浦烟夕揚帆海月生江陵識遙火應到渚宮城

上三峽

巫山夾青天巴水流若茲巴水忽可盡青天無到時
三朝上黃牛三暮行太遲三朝又三暮不覺鬢成絲

自巴東舟行經瞿唐峽登巫山最高峰晚還題
壁

江行幾千里海月十五圓始經瞿唐峽遂步巫山巔巫
山高不窮巴國盡所歷日邊攀垂蘿霞外倚穹石飛步
凌絕頂極目無纖烟却顧失丹壑仰觀臨青天青天若
可捫銀漢去安在望雲知蒼梧記水辨瀛海周遊孤光
晚歷覽幽意多積雪照空谷悲風鳴森柯歸途行欲曛
佳趣尚未歇江寒早啼猿松暝已吐月月色何悠悠清

猿響啾啾辭山不忍聽揮策還孤舟

早發白帝城

一作白帝
下江陵

朝辭白帝彩雲間千里江陵一日還兩岸猿聲啼不盡

輕舟已過萬重山

一作須臾過
却萬重山

秋下荆門

霜落荆門江樹空布帆無恙挂秋風此行不為鱸魚膾
自愛名山入剡中

江行寄遠

剡木出吳楚危樅百餘尺疾風吹片帆日暮千里隔別
時酒猶在已為異鄉客思君不可得愁見江水碧

宿五松山下荀媪家

宣州

我宿五松下寂寥無所歡田家秋作苦鄰女夜春寒跪
進彫胡飯月光明素盤令人慚漂母三謝不能冷

下涇縣陵陽溪至澁灘

澁灘鳴嘈嘈兩山足猿猱白波若卷雪側石不容舠漁
人與舟人撐折萬張篙

下陵陽公高溪三門六刺灘

三門橫峻灘六刺走波瀾石驚虎伏起水狀龍縈盤何
慙七里瀨使我欲垂竿

夜泊黃山聞殷十四吳吟

昨夜誰為吳會吟風生萬壑振空林龍驚不敢水中卧
猿嘯時聞巖下音我宿黃山碧溪月聽之却罷松間琴
朝來果是滄洲逸酤酒提盤飯霜栗半酣更發江海聲
客愁頓向盃中失

宿鰕湖

雞鳴發黃山，暝投鰕湖宿。
白雨映寒山，森森似銀竹。
提携鈿客結荷水邊，沐半夜四天開。
星河爛，人目明。晨大樓去崗隴，多屈伏。
當與持斧翁，前溪伐雲木。

懷古

西施

吳越

西施越溪女，出自苧羅山。
秀色掩今古，荷花羞玉顏。
浣紗弄碧水，自與清波閑。
皓齒信難開，沉吟碧雲間。
句踐

徵絕艷揚蛾入吳關提攜館娃宮杳渺詎可攀一破夫
差國千秋竟不還

王右軍

右軍本清真瀟灑在風塵山陰遇羽客要比好鵝賓掃
素寫道經筆精妙入神書罷龍鵝去何曾別主人

上元夫人

上元誰夫人偏得王母嬌嗟峨三角髻餘髮散垂腰裘
披青毛錦身著赤霜袍手提羸女兒閑與鳳吹簫眉語

兩自笑忽然隨風飄

蘇臺覽古

舊苑荒臺楊柳新菱歌清唱不勝春
只今唯有西江月
曾照吳王宮裏人

越中覽古

越王勾踐破吳歸義士還家盡錦衣
宮女如花滿春殿
只今唯有鷓鴣飛

商山四皓

白髮四老人昂藏南山側偃卧松雪間冥翳不可識雲
牕拂青靄石壁橫翠色龍虎方戰爭於焉自休息秦人
失金鏡漢祖昇紫極陰虹濁太陽前星遂淪匿一行佐
明兩歛起生羽翼功成身不居舒卷在胸臆窅冥合元
化茫昧信難測飛聲塞天衢萬古仰遺迹

過四皓墓

我行至商洛幽獨訪神仙園綺復安在雲蘿尚宛然荒
涼千古跡蕪沒四墳連伊昔鍊金鼎何言閉玉泉隴寒

唯有月松古漸無烟木魅風號去山精雨嘯旋紫芝高
詠罷青史舊名傳今日併如此哀哉信可憐

峴山懷古

訪古登峴首憑高眺襄中天清遠峰出水落寒沙空弄
珠見遊女醉酒一作月懷山公感歎發秋興長松鳴夜風

自廣平乘醉走馬六十里至邯鄲登城樓覽古

書懷

燕趙

醉騎白花駱

一作馬

西走邯鄲城揚鞭動柳色寫鞚春風

生入郭登高樓山川與雲平深宮翳綠草

一作雄都
半古冢

事傷人情相如章華巔猛氣折秦嬴兩虎不可鬪廉公

終負荆提攜袴中兒杵臼及程嬰空孤獻白刃

一作立
孤就白

刃必死耀丹誠平原三千客談笑盡豪英毛君能穎脫

二國且同盟皆為黃泉土使我涕縱橫磊磊石子崗蕭

蕭白楊聲諸賢

一作
賢豪

沒此地碑版有殘銘太古共今時

由來互衰榮傷哉何足道感激仰空

一作
虛

名趙俗愛長

劒文儒少逢迎閑從博陵

一作
徒

遊帳飲雪朝醒

一作雪
中醒

歌酣易水動鼓震叢臺傾日落把燭歸凌晨向燕京方
陳五餌策一使胡塵清

蘇武

蘇武在匈奴十年持漢節白雁上林飛空傳一書札牧
羊邊地苦落日歸心絕渴飲月窟冰飢餐天上雪東還
砂塞遠北愴河梁別泣把李陵衣相看淚成血

經下邳圯橋懷張子房

淮泗

子房未虎嘯破產不為家滄海得壯士椎秦博浪沙報

韓雖不成天地皆振動潛匿遊下邳豈曰非智勇我來
圯橋上懷古欽英風唯見碧流水曾無黃石公歎息此
人去蕭條徐泗空

月夜金陵懷古

金陵

蒼蒼金陵月空懸帝王州天文列宿在霸

一作鼎

業大江

流淥水絕馳道青松摧古丘臺傾鳩鵲觀宮沒鳳皇樓

別殿悲清暑芳園罷樂遊一聞歌玉樹蕭瑟後庭秋

一作

千古不
勝愁

金陵三首

晉家南渡日此地舊

一作即

長安地即帝王宅山為龍虎

盤

一作碧宇樓臺
滿青山龍虎盤

金陵空壯觀天塹

一作江塞

淨波瀾醉客

迴橈去吳歌且自歡

一作誰云
行路難

地擁金陵勢城迴江

一作漢

水流當時百萬戶夾道起朱

樓亡國生春草離宮沒古丘空餘後湖月波上對瀛洲

六代興亡國三盃為爾歌苑方秦地少

一作小

山似洛陽

多古殿吳花草深宮晉綺羅併隨人事滅東逝與

一作只

滄波

秋夜板橋浦汎月獨酌懷謝朓

天上何所有迢迢白玉繩斜低建章闕耿耿對金陵漢
水舊如練霜江夜清澄長川瀉落月洲渚曉寒凝獨酌
板橋浦古人誰可徵玄暉難再得灑酒氣填膺

金陵新亭

金陵風景好豪士集新亭舉目山河異偏傷周顗情四
坐楚囚悲不憂社稷傾王公何慷慨千載仰雄名

過彭蠡湖 尋陽

謝公入彭蠡因此遊松門余方窺石鏡兼得窮江源前
賞迹可見後來道空存而欲繼風雅豈唯清心魂雲海
方助興波濤何足論青嶂憶遙月綠蘿鳴愁猿水碧或
可採金膏祕莫言余將振衣去羽化出囂煩

入彭蠡經松門觀石鏡緬懷謝康樂題詩書遊

覽之志

二篇或同或異故并錄之

謝公之彭蠡因此遊松門余方窺石鏡兼得窮江源將

欲繼風雅豈徒清
心魂前賞逾所見
後來道空存況屬
臨汎美而無洲渚
喧漾水向東去漳
流直南奔空濛三
川夕迴合千里昏
青桂隱遙月綠楓
鳴愁猿水碧或可
采金精祕莫論吾
將學仙去冀與琴
高言

廬江主人婦

宿松

孔雀東飛何處棲
廬江小吏仲卿妻
為客裁縫石自見
城烏獨宿夜空啼

陪宋中丞武昌夜飲懷古

江夏

清景南樓夜風流在武昌庾公愛秋月乘興坐胡牀龍
笛吟寒水天河落曉霜我心還不淺懷古

一作
留客

醉餘觴

望鸚鵡洲悲禰衡

魏帝營八極蟻觀一禰衡黃祖斗筭人殺之受惡名吳
江賦鸚鵡落筆超羣英鏘鏘振金玉句句欲飛鳴鵲鶚
啄孤鳳千春傷我情五岳起方寸隱然詎可平才高竟
何施寡識冒天刑至今芳洲上蘭蕙不忍生

宿巫山下

巫峽

昨夜巫山下猿聲夢裡長
桃花飛淥水三月下瞿塘
雨色風吹去南行拂楚王
高丘懷宋玉訪古一霑裳

金陵白楊十字巷

白楊十字巷北夾湖溝道
不見吳時人空生唐年草
天地有反覆宮城盡傾倒
六帝餘古丘樵蘇泣遺老

謝公亭

蓋謝朓范
雲之所游

謝亭離別處風景每生愁
客散青天月山空碧水流
池花春映日牕竹夜鳴秋
今古一相接長歌懷舊遊

紀南陵題五松山

一作南陵五松山感時
贈別山名銅坑村五里

聖達有去就潛光愚其德魚與龍同池龍去魚不測當

時板築輩豈知傳說情一朝和

一作雨

殷人光氣為列星

伊尹生空桑捐庖佐皇極桐宮放太甲攝政無愧色三

年帝道明委質終輔翼曠哉至人心萬古可為則時命

或大謬仲尼將

一作其

奈何鸞鳳忽覆巢麒麟不來過龜

山蔽魯國有斧且無柯歸去來歸去來

一作歸來
歸去來

宵濟

越洪波

夜泊牛渚懷古

此地即謝尚聞袁宏詠史處

牛渚西江夜青天無片雲登舟望秋月空憶謝將軍余

亦能高詠斯人不可聞明朝挂帆席

一作洞庭去

楓葉落

一作

正紛紛

姑孰十詠

姑孰谿

愛此溪水閑乘流興無極漾楫怕鷗驚垂竿待魚食波
翻曉霞影岸疊春山色何處浣紗人紅顏未相識

丹陽湖

湖與元氣連風波浩難止天外賈客歸雲間片帆起龜
遊蓮葉上鳥宿蘆花裡少女棹輕舟歌聲逐流水

謝公宅

青山日將暝寂寞謝公宅竹裡無人聲池中虛月白荒
庭衰草徧廢井蒼苔積唯有清風閑時時起泉石

凌歊臺

曠望登古臺臺高極人目疊嶂列遠空雜花間平陸閑

雲入牕牖野翠生松竹欲覽碑上文苔侵豈堪讀

桓公井

桓公名已古廢井曾未竭石甃冷蒼苔寒泉湛孤月秋
來桐暫落春至桃還發路遠人罕窺誰能見清澈

慈姥竹

野竹攢石生含烟映江島翠色落波深虛聲帶寒草龍
吟曾未聽鳳曲吹應好不學蒲柳凋貞心常自保

望夫山

寫望臨碧空，怨情感離別。
江草不知愁，巖花但爭發。
雲山萬重隔，音信千里絕。
春去秋復來，相思幾時歇。

牛渚磯


絕壁臨巨川，連峰勢相向。
亂石流湍間，迴波自成浪。
但驚羣木秀，莫測精靈狀。
更聽猿夜啼，憂心醉江上。

靈墟山

丁令辭世人，拂衣向仙路。
伏鍊九丹成，方隨五雲去。
松蘿蔽幽洞，桃杏深隱處。
不知曾化鶴，遼海歸幾度。

天門山

迥出江上山雙峰自相對
岸映松色寒石分浪花碎
參差遠天際縹緲晴霞外
落日舟去遙迴首沈青靄



李太白文集卷十九

欽定四庫全書

集部

李太白文集卷

二十四

詳校官侍郎

臣謝墉

檢討

臣何思鈞覆勘

總校官庶吉士

臣

何思鈞

校對官中書

臣李

荃

謄錄監生

臣

馮士新

欽定四庫全書

李太白文集卷二十

唐 李白 撰

歌詩四十七首

閑適

與元丹丘方城寺談玄作

蜀中一作
仙城山寺

茫茫大夢中唯我獨先覺
騰轉風火來假合作容貌滅
昏昏疑盡領略入精要
澄慮觀此身因得通寂照
朗悟

前後際始知金仙妙幸逢禪居人酌玉坐相召彼我俱
若喪雲山豈殊調清風生虛空明月見談笑怡然青蓮
宮永願恣遊眺

尋高鳳石門山中元丹丘

楚漢

尋幽無前期乘興不覺遠蒼崖渺難涉白日忽欲晚未
窮三四山已歷千萬轉寂寂聞猿愁行行見雲收高松
來好月空谷宜清秋谿深古雪在石斷寒泉流峰巒秀
中天登眺不可盡丹丘遙相呼顧我忽而哂遂造窮谷

間始知靜者閑留歡達永夜清曉方言還

安州般若寺水閣納涼喜遇薛員外又

安州

翛然金園賞遠近含晴光樓臺成海氣草木皆天香忽
逢青雲士共解丹霞裳水退池上熱風生松下涼吞討
破萬象寥窺臨衆芳而我遺有漏與君用無方心垢都
已滅永言題禪房

魯中都東樓醉起作

魯中

昨日東樓醉

一作東城飲

還應

一作歸來

倒接羅阿誰扶上馬不

省下樓時

對酒醉題屈突明府廳

吳中

陶令八十日長歌歸去來故人建昌宰借問幾時迴風
落吳江雪紛紛入酒杯山翁今已醉舞袖為君開

月下獨酌四首

長安

花間

一作下

一壺酒獨酌無相親舉盃邀明月對影成三

人月既不解飲影徒隨我身暫伴月將影行樂須及春
我歌月徘徊我舞影凌亂醒時同交歡醉後各分散永

結無情遊相期邈雲漢

天若不愛酒酒星不在天地若不愛酒地應無酒泉天
地既愛酒愛酒不愧天已聞清比聖復道濁如賢賢聖
既已飲何必求神仙三盃通大道一斗合自然但得醉
中趣勿為醒者傳

三月咸陽時

一作城

千花晝如錦

一作好鳥吟清風落花散如錦又作園鳥語成

歌庭花
笑如錦

誰能春獨愁對此徑須飲窮通與脩短造化風

所稟一樽齊死生萬事固難審醉後失天地兀然就孤

枕不知有吾身此樂最為甚

窮愁千萬端

一作有千端

美酒三百杯

一作唯數杯

愁多酒雖少

酒傾愁不來所以知酒聖

一作聖賢

酒酣心自開辭粟卧首

陽

一作餓伯夷

屢空飢

一作悲

顏回當代不樂飲虛名安用哉

蟹螯即金液糟丘是蓬萊且須飲美酒乘月醉高臺

春歸終南山松龍舊隱

我來南山陽事事不異昔却尋溪中水還望巖下石
薔薇緣東牕女蘿遶北壁別來能幾日草木長數尺且復

命酒樽獨酌陶永夕

冬夜醉宿龍門覺起言志

洛陽

醉來脫寶劍旅憩高堂眠中夜忽驚覺起立明燈前開
軒聊直望曉雪河水壯哀哀歌苦寒鬱鬱獨惆悵傳說
板築臣李斯鴈夫人飈起匡社稷寧復長艱辛而我胡
為者歎息龍門下富貴未可期殷憂向誰寫去去淚滿
襟舉聲梁甫吟青雲當自致何必求知音

尋山僧不遇作

金陵

石徑入丹壑松門閉青苔閑階有鳥跡禪室無人開窺
牕見白拂挂壁生塵埃使我空歎息欲去仍徘徊香雲
隔山起花雨從天來已有空樂好況聞青猿哀了然絕
世事此地方悠哉

過汪氏別業二首

遊山誰可遊予明與浮丘疊嶺礙河漢連峰橫斗牛汪
生面北阜池館清且幽我來感意氣椎魚列珍羞掃石
待歸月開池漲寒流酒酣益爽氣為樂不知秋

疇昔未識君，知君好賢才。
隨山起館宇，鑿石營池臺。
星火五月中，景風從南來。
數枝石榴發，一丈荷花開。
恨不當此時，相過醉金罍。
我行值木落，月苦清猿哀。
永夜達五更，吳歎送瓊盃。
酒酣欲起舞，四座歌相催。
日出遠海明，軒車且徘徊。
更遶龍潭去，枕石拂莓苔。

待酒不至

玉壺繫青絲，沽酒來何遲。
山花向我笑，正好銜盃時。
晚酌東牕下，流鶯復在茲。
春風與醉客，今日乃相宜。

獨酌

春草如有意羅生玉堂陰東風吹愁來白髮坐相侵獨
酌勸孤影閑歌面芳林長松爾何知一作本無情蕭瑟為誰

吟手舞石上月膝橫花間琴過此一壺外悠悠非我心
一本云春草變綠野新鶯有佳音落日不盡歡恐為愁所侵獨酌勸孤影閑歌面芳林清風尋空來碧松與共吟手舞石上月膝橫花下琴過此一壺外悠悠非我心

友人會宿

滌蕩千古愁留連百壺飲良宵宜清談皓月一作然未能

寢醉來卧空山天地即衾枕

春日獨酌二首

東風扇淑氣水木榮春暉
白日照綠草落花散且飛
孤雲還空山衆鳥各已歸
彼物皆有託吾生獨無依
對此石上月長歌醉芳菲

我有紫霞想緬懷滄洲間
且對一壺酒澹然萬事閑
橫琴倚高松把酒望遠山
長空去鳥沒落日孤雲還
但悲光景晚宿昔成秋顏

金陵江上遇蓬池隱者

時於落星石上以紫綺裹換酒為歡

心愛名山遊身隨名山遠羅浮麻姑臺此去或未返遇
君蓬池隱就我石上飯空言不成歡強笑惜日晚綠水
向雁關黃雲蔽龍山歎息兩客鳥徘徊吳越間一語一
執手留連夜將久解我紫綺裘且換金陵酒酒來笑復
歌興酣樂事多水影弄月色清光奈愁何明晨挂帆席
離恨滿滄波

月夜聽盧子順彈琴

閑夜坐明月幽人彈素琴忽聞悲風調宛若寒松吟白
雪亂纖手淥水清虛心鍾期久已歿世上無知音

青溪半夜聞笛

秋浦

羌笛梅花引吳溪隴水清

一作情

寒山秋浦月

一作空山
滿明月

腸斷玉關情

一作聲

日夕山中忽然有懷

廬山

久卧名

一作青

山雲遂為名

一作青

山客山深

一作春

雲更好

賞弄終日夕月衡樓間峰泉漱階下石素心自此得真

趣非外借鼙啼桂方秋風滅籟歸寂緬思洪崖術欲往

滄海

一作島

隔雲車來何遲撫已空歎息

夏日山中

嬾搖白羽扇裸袒青林中脫巾挂石壁露頂灑松風

山中與幽人對酌

兩人對酌山花開一盃一盃復一盃我醉欲眠卿且去
明朝有意抱琴來

春日醉起言志

處世若大夢胡為勞其生所以終日醉頽然卧前楹覺
來眄庭前一鳥花間鳴借問此何時春風語流鶯感之
欲歎息對酒還自傾浩歌待明月曲盡已忘情

廬山東林寺夜懷

我尋青蓮宇獨往謝城闕霜清東林鍾水白虎溪月天
香生虛空天樂鳴不歇宴坐寂不動大千入毫髮湛然
冥真心曠劫斷出沒

尋雍尊師隱居

羣峭碧磨天逍遙不記年撥雲尋古道倚樹聽流泉花
暖青牛卧松高白鶴眠語來江色暮獨自下寒烟

與史郎中飲聽黃鸝樓上吹笛

江夏

一為遷客去長沙西望長安不見家黃鸝樓中吹玉笛
江城五月落梅花

對酒

勸君莫拒盃春風笑人來桃李如舊識傾花向我開流
鶯啼碧樹明月窺金罍昨來朱顏子今日白髮催棘生

石虎殷鹿走姑蘇臺自古帝王宅城闕閉黃埃君若不
飲酒昔人安在哉

醉題王漢陽廳

我似鷓鴣鳥南遷嬾北飛時尋漢陽令取醉月中歸

嘲王歷陽不肯飲酒

歷陽

地白風色寒雪花大如手笑殺陶淵明不飲杯中酒浪
撫一張琴虛栽五株柳空負頭上巾吾於爾何有

獨坐敬亭山

宣城

衆鳥高飛盡孤雲獨去閑相看兩不厭只有敬亭山

自遣

對酒不覺暝落花盈我衣醉起步溪月鳥還人亦稀

訪戴天山道士不遇

犬吠水聲中桃花帶露濃樹深時見鹿溪午不聞鍾野竹分青靄飛泉挂碧峰無人知所去愁倚兩三松

秋日與張少府楚城韋公藏書高齋作

日下空亭暮城荒古跡餘地形連海盡天影落江虛舊

賞人雖隔新知樂未踈
綵雲思作賦丹壁間藏書
查擁
隨流葉萍開出水魚夕來
秋興滿回首意何如

懷思

秋夜獨坐懷故山

去長安後

小隱慕安石遠遊學子平
天書訪江海雲卧起咸京入
侍瑤池宴出陪玉輦行
誇胡新賦作諫獵短書成
但奉
紫霄顧非邀青史名
莊周空說劒墨翟恥論兵
拙薄遂
踈絕歸閑事耦耕
顧無蒼生望空愛紫芝榮
寥落暝霞

色微茫舊壑情秋山綠蘿月今夕為誰明

憶崔郎中宗之遊南陽遺吾孔子琴撫之泚然

感舊

昔在南陽城唯餐獨山蕨憶與崔宗之白水弄素月時
過菊潭上縱酒無休歇汎此黃金花頽然清歌發一朝
摧玉樹生死殊飄忽留我孔子琴琴存人已沒誰傳廣
陵散但哭邱山骨泉戶何時明長歸狐兔窟

憶東山二首

不向東山久薔薇幾度花白雲他自散明月落誰家
我今攜謝妓長嘯絕人羣欲報東山客開闢掃白雲

望月有懷

清泉映疎松不知幾千古寒月搖輕波流光入牕戶對
此空長吟思君意何深無因見安道興盡愁人心

對酒憶賀監二首

并序

太子賓客賀公於長安紫極宮一見余呼余為謫仙
人因解金龜換酒為樂沒後對酒悵然有懷而作是

詩

四明有狂客風流

一作霞衣

賀季真長安一相見呼我謫仙

人昔好孟中物翻

一作今

為松下塵金龜換酒處却憶淚

沾巾

狂客歸四明山陰道士迎敕賜鏡湖水為君臺沼榮人
亡餘故宅空有荷花生念此杳如夢淒然傷我情

重憶一首

欲向江東去定將誰舉杯稽山無賀老却棹酒船回

春滯沅湘有懷山中

沅湘春色還風暖烟草綠古之傷心人於此腸斷續予
非懷沙客但美採菱曲所願歸東山寸心於此足

落日憶山中

雨後烟景綠晴天散餘霞東風隨春歸發我枝上花花
落時欲暮見此令人嗟願遊名山去學道飛丹砂

憶秋浦桃花舊遊時竄夜郎

桃花春水生白石今出沒搖蕩女蘿枝半挂青天月不

知舊行徑初拳幾枝蕨三載夜郎還於茲鍊金骨

李太白文集卷二十

欽定四庫全書

李太白文集卷二十一

唐李白撰

歌詩四十五首

感遇

越中秋懷

越水遶碧山周迴數千里乃是天鏡中分明畫相似

一本

首四句云蹈海思仲連遊山慕康樂攀雲窮千峰弄水涉萬壑下同

愛此從冥搜永懷臨

湍遊

一作林湍曲

一為滄波客十見紅蕖秋觀濤壯天險望

海令人愁路遐迫西照歲晚悲東流何必探禹穴擔將
歸蓬丘不然五湖上亦可乘扁舟

效古二首

朝入天苑中謁帝蓬萊宮青山映輦道碧樹搖烟空謬
題金閨籍得與銀臺通待詔奉明主抽毫頌清風歸時
落日晚蹀躞浮雲驄人馬本無意飛馳自豪雄入門紫
駕鵞金井雙梧桐清歌弦古曲美酒沽新豐快意且為

樂列筵坐羣公光景不可留生世如轉蓬早達勝晚遇
羞比垂釣翁

自古有秀色西施與東鄰蛾眉不可妬况乃効其嚬所
以尹婕妤羞見邢夫人低頭不出氣塞默少精神寄語
無鹽子如君何足珍

感寓二首

寶劍雙蛟龍雪花照芙蓉精光射天地電騰不可衝一
去別金匣飛沈失相從風胡歿已久

一作聖人歿已久

所以潛

其鋒吳水深萬丈楚山邈千重雌雄終不隔神物會當逢

咸陽二三月百鳥鳴花枝

一作宮柳黃金枝

玉劍誰家子西秦

豪俠兒

一作綠幘誰家子賣珠輕薄兒

日暮醉酒歸白馬驕且馳意氣

人所仰

一作傾

遊冶方及時子雲不曉事晚獻長楊詞賦

達身已老草玄鬢若絲投閣良可歎但為此輩嗤

擬古十二首

青天何歷歷明星白如石黃姑與織女相去不盈尺銀

河無鵲橋非時將安適
閨人理紈素遊子悲行役
瓶冰知冬寒霜露欺遠客
客以秋葉飛飄飄不言歸
別後羅帶長愁寬去時衣
乘月託宵夢因之寄金嶽

高樓入青天下有白玉堂
明月看欲墮當牕懸清光
遙夜一美人羅衣霑秋霜
含情弄柔瑟彈作陌上桑
弦聲何激烈風卷繞飛梁
行人皆躑躅棲鳥去回翔
但寫妾意苦莫辭此曲傷
願逢同心者飛作紫鴛鴦

長繩難繫日自古共悲辛
黃金高北斗不惜買陽春
石

火無留光還如世中人即事已如夢後來我誰身提壺
莫辭貪取酒會四鄰仙人殊恍惚未若醉中真

清都綠玉樹灼爍瑤臺春攀花弄秀色遠贈天仙人香
風送紫藥直到扶桑津恥掇世上豔所貴心之珍相思
傳一笑聊欲示情親

今日風日好明日恐不如春風笑於人何乃愁自居吹
簫舞彩鳳酌醴膾神魚千金買一醉取樂不求餘達士
遺天地東門有二疏愚夫同瓦石有才知卷舒無事坐

悲苦塊然涸轍魚

運速天地閉胡風結飛霜百草死冬月六龍頽西荒太
白出東方彗星揚精光鴛鴦非越鳥何為眷南翔惟昔
鷹將犬今為侯與王得水成蛟龍爭池奪鳳皇北斗不
酌酒南箕空簸揚

世路今太行迴車竟何託萬族皆凋枯遂無少可樂曠
野多白骨幽魂共銷鑠榮貴當及時春華宜照灼人非
崑山玉安得長璫錯身沒期不朽榮名在麟閣

月色不可掃客愁不可道玉露生秋衣流螢飛百草日
月終銷毀天地同枯槁蟋蟀啼青松安見此樹老金丹
寧誤俗昧者難精討爾非千歲翁多恨去世早飲酒入
玉壺藏身以為寶

生者為過客死者為歸人天地一逆旅同悲萬古塵月

兔空搏藥扶桑已成

一作以為

薪白骨寂無言青松豈知春

前後更歎息浮榮何足珍

仙人騎綵鳳昨下閭風峯海水三清淺桃源一見尋遺

我綠玉盃兼之紫瓊琴盃以傾美酒琴以閑素心二物
非世有何論珠與金琴彈松裡風盃勸天上月風月長
相知世人何倏忽

涉江弄秋水愛此荷花鮮攀荷弄其珠蕩漾不成圓佳
期綵雲重欲贈隔遠天相思無由見悵望涼風前

去去復去去辭君還憶君漢水既殊流楚山亦此分人
生難稱意豈得長為羣越鷺喜海日燕鴻思朔雲別久
容華晚琅玕不能飯日落知天昏夢長覺道遠望夫登

高山化石竟不返

感興八首

瑤姬天帝女精彩化朝雲宛轉入夢宵無心向楚君錦
衾抱秋月綺席空蘭芬茫昧竟誰測虛傳宋玉文

洛浦有宓妃飄飄雪爭飛輕雲拂素月了可見清輝解
珮欲西走含情詎相違香塵動羅襪淶水不沾衣陳王
徒作賦神女豈同歸好色傷大雅多為世所譏

裂素持作書將寄萬里懷眷眷待遠信竟歲無人來征

鴻務從陽又不為我棲委之在深篋塵魚壞其題何如
投火中流落他人開不惜他人開但恐生是非

芙蓉嬌綠波桃李誇白日偶蒙春風榮生此豔陽質豈
無佳人色但恐花不實宛轉龍火飛零落互相失詎知
凌寒松千載長守一

十五遊神仙仙遊未曾歇吹笙吟松風汎瑟窺海月西
山玉童子使我鍊金骨欲逐黃鶴飛相呼向蓬闕

西國有美女結樓青雲端蛾眉豔曉月一笑傾城歡高

節奪明主炯心如凝丹常恐彩色晚不為人所觀安得
配君子共成雙飛鸞

竭來荆山客誰為珉玉分良寶絕見弃虛持三獻君直
木忌先伐芬蘭哀自焚盈滿天所損沈冥道所羣東海
有碧水西山多白雲魯連及夷齊可以躡清芬

嘉穀隱豐草草深苗且稀農夫既不異孤穗將安歸常
恐委疇隴忽與秋蓬飛烏得薦宗廟為君生光輝

寓言三首

周公負斧戢成王何夔夔武王昔不豫剪爪投河湄賢
聖遇讒慝不免人君疑天風拔大木禾黍咸傷萎管蔡
扇蒼蠅公賦鴟鵂詩金縢若不啓忠信誰明之

遙裔雙綵鳳婉孌三青禽往還瑤臺裏鳴舞玉山岑以
歡秦娥意復得王母心區區精衛鳥銜木空哀吟
長安春色歸先入青門道綠楊不自持從風欲傾倒海
鷺還秦宮雙飛入簾櫳相思不可見託夢遼城東

秋夕旅懷

涼風度秋海吹我鄉思飛連山去無際流水何時歸日
夕浮雲色心斷明月暉芳草歇柔艷白露催寒衣夢長
銀漢落覺罷天星稀含歎想舊國泣下誰能揮

感遇四首

吾愛王子晉得道伊洛濱金骨既不毀玉顏長自春可
憐浮丘公倚靡與情親舉手白日間分明謝時人二仙
去已遠夢想空殷勤

可歎東籬菊莖疎葉且微雖言異蘭蕙亦自有芳菲未

汎盈樽酒徒沾清露輝當榮君不採飄落欲何依

昔余聞常娥竊藥駐雲髮不自嬌玉顏方希鍊金骨飛
去身莫返含笑坐明月紫宮誇蛾眉隨手會凋歇

宋玉事楚王立身本高潔巫山賦綵雲郢路歌白雪舉
國莫能和巴人皆卷舌一惑登徒言恩情遂中絕

寫懷

翰林讀書言懷呈集賢院內諸學士

長安

晨趨紫禁中夕待金門詔觀書散遺帙探古窮至妙片

言苟會心掩卷忽而笑青蠅易相點白雪難同調本是
踈散人屢貽褊促誚雲天屬清朗林壑憶遊眺或時清
風來閑倚欄一作
簷下嘯嚴光桐廬溪謝客臨海嶠功成

謝人君

一作
問

從此一投釣

尋陽紫極宮感秋作

何處聞秋聲脩脩北牕竹迴薄萬古心攬之不盈掬靜
坐觀衆妙浩然媚幽獨白雲南山來就我簷下宿嬾從
唐生決羞訪李主卜四十九年非一往不可復野情轉

蕭散世道有翻覆陶令歸去來田家酒應熟

江上秋懷

餐霞卧舊壑散髮謝遠遊山蟬號枯桑始復知天秋朔
雁別海裔越鷺辭江樓颯颯風卷沙茫茫霧縈洲黃雲
結暮色白水揚寒流惻愴心自悲潺湲淚難收蘅蘭方
蕭瑟長歎令人愁

秋夕書懷

一作秋日
南遊書懷

北風吹海雁南度落寒聲感此瀟湘客懷其流浪情海

懷結滄洲

一作遠心
飛蒼梧

霞

一作遊

想遙

一作游

赤城始探蓬壺

事

一作始採
蓬壺術

旋覺天地輕澹然吟

一作思

高秋閑卧瞻太

清蘿月掩

一作隱

空幕松霜皓

一作雲散

前楹滅見息羣動獵

微窮至精桃花有源水可以保吾生

避地司空原言懷

舒州

南風昔不競豪聖思經綸劉琨與祖逖起舞雞鳴晨雖
有匡濟心終為樂禍人我則異於是潛光皖水濱卜築
司空原北將天柱鄰雪霽萬里月雲開九江春俟乎泰

階平然後託微身，傾家事金鼎。年兒何長新，所願得此道終然保清真。弄景奔日馭，攀星戲河津。一隨王喬去，

長年玉天賓。

南奔書懷

一作自丹陽
南奔道中作

遙夜何漫漫

一作何
時旦

空歌白石爛，寧戚未匡齊。陳平終

佐漢，橈槍掃河洛，直割鴻溝半。歷數方未遷，雲雷屢

一作

起多難。天人秉旄鉞，虎竹光藩翰。侍筆黃金臺，傳觴青玉案。不因秋風起，自有思歸歎。主將動讒疑，王師忽離

叛自來白沙上

一作兵羅
滄海上

鼓噪丹陽岸賓御如浮雲從

風各消散舟中指可掬城上骸爭爨草草出近關行行
昧前算南奔劇星火北寇無涯畔顧乏七寶鞭留連道
邊翫太白夜食昂長虹日中貫秦趙興天兵茫茫九州
亂感遇一作結明主恩頗高祖遜言過江誓流水志在清
中原拔劒擊前柱悲歌難重論

上崔相百憂章

四言時在
潯陽秋

共工赫怒天維中摧鯢鯨噴蕩揚濤起雷魚龍陷人成

此禍胎火焚昆山玉石相碰仰希霖雨灑寶炎煨箭發
石開戈揮日迴鄒衍慟哭燕霜颯來微誠不感猶贅一作

紮夏臺蒼鷹搏攫丹棘崔嵬豪聖凋枯王風傷哀斯文
未喪東岳豈顏穆逃楚難鄒脫吳災見機苦遲二公所

咍驥不驟進麟何來哉星離一門草擲二孩萬憤結緝

一作憂從中催金瑟玉壺盡為愁媒舉酒太息泣血盈

孟台星再朗天網重恢屈法申恩棄瑕取材治長非罪

尼父無猜覆盆儻舉應照寒灰

萬憤詞投魏郎中

海水渤潏人罹鯨鯢菑胡沙而四塞始滔天於燕齊何
六龍之浩蕩遷白日於秦西九土星分嗷嗷淒淒南冠
君子呼天而啼戀高堂而掩泣淚血地而成泥獄戶春
而不草獨幽怨而沈迷凡九江兮第三峽悲羽化之難
齊穆陵關北愁愛子豫章天南隔老妻一門骨肉散百
草遇難不復相提攜樹榛拔桂囚鸞寵難舜昔授禹伯
成耕犁德自此衰吾將安栖好我者恤我不好我者何

忍臨危而相擠子胥鵠夷彭越醢醢自古豪烈胡為此
繫蒼蒼之天高乎視低如其聽卑脫我牢狴儻辨美玉
君收白珪

荊州賊亂臨洞庭言懷作

修蛇橫洞庭吞象臨江島積骨成巴陵遺言聞楚老水
窮三苗國地窄三湘道歲晏天崢嶸時危人枯槁思歸
阻喪亂去國傷懷抱郢路方丘墟章華亦傾倒風悲猿
嘯苦木落鴻飛早日隱西赤沙月明東城草關河望已

欽定四庫全書

李太白文集
卷二十一

十一

絕氛霧行當掃長叫天可聞吾將問蒼昊

覽鏡書懷

得道無古今失道還衰老自笑鏡中人白髮如霜草捫
心空歎息問影何枯槁桃李竟何言終成南山皓

田園言懷

賈誼三年謫班超萬里侯何如牽白犢飲水對清流

江南春懷

青春幾何時黃鳥鳴不歇天涯失鄉一作歸路江外老華

髮心飛秦塞雲影滯楚關月身世殊爛漫田園久蕪沒
歲晏何所從長歌謝金闕

欽定四庫全書

李太白文集
卷二十一

十三

李太白文集卷二十一